

111 年全國語文競賽客家語朗讀文章高中學生組（大埔腔）

編號 1 號

【暗晡頭个海脣】彭瑞珠原作

暗晡頭个海脣，無麼个人，天頂个月光，畏事畏事囡在雲背後；拘禮个海風，驚生份樣吹一陣又恬一陣，出海口个海浪，慢板慢板在該激啊激¹。無人出入个魚市場肚，斯單淨伸著，幾葩²孤栖个電火，還過，幾臺摧啊摧³个抽風機。

魚市場外背闊闊个停車場這片，犖花犖花⁴停幾臺自用車，還毋想睡个駛車人，有人帶緊罐頭來餵流浪狗、也有人帶緊釣槓來湊月光釣魚。魚市場該片遠遠个停車場邊脣，幾下個越暗越有元氣个後生人，載緊裝有大喇叭个音響，同車後斗撒向天、三臺車比比企，在該咚滋咚滋⁵尋月光共下跳舞。

右手片个音樂聲撩都吾腳底撓撓，毋過，左手片騎緊過个兩臺奧多拜，錫著吾目珠。佢跔緊厥等个身影，行上兩百八十公尺長个笨鯊橋，想去看看，頭那項裝緊電火个兩個網魚人，係愛網麼个魚？月光也探頭出來咧，一浪一浪个水紋，在月光下看去清

清楚楚，一張魚網、兩個網魚人，落網、收網，撈起來个係一網个月光。雖然，連魚屎都無，毋過，厥等還係有講有笑，佢想，厥等怕係為著愛打嘴鼓來个敢，網魚，單淨係兩同年想在月光下共下奈个理由忒等。

橋下个河壩水，也認同吾个想法「係啊，係啊！」緊應緊大聲，佢緊聽緊生趣。毋過，看真來，該「係啊，係啊！」个聲說，怕係河壩水分海浪打轉來，抑係海浪激上河壩水个聲啊！

毋多知，斯分佢行過笨鯊橋咧。橋這片，日時頭分人箭都轂轂个鐵馬，這下通棚一列列企好、企正，在月光下恬靜。光華華个路燈下，無人上下咧，斯單淨一隻背核螺殼个老蟹，對白沙堆探頭出來又囡倒轉去，對路脣趟過來又趟倒轉去，自家在月光下搞囡人尋。佢企在路脣，看老蟹、看流流流流个河壩水，在共樣个月光下，已像分佢看著咧，頭擺，該一大陣笨鯊入港之時，客家打漁人厥等面項个笑容。

¹ 激啊激：音 gieb` a+ gieb`；液體來回晃動貌。

² 幾葩：音 gi` pa+；幾盞。

³ 摧啊摧：音 kog` a+ kog`；此為形容機器轉動的聲音和狀態。

⁴ 犖花犖花：音 lo` fa+ lo` fa+；稀疏間雜著其他花色的樣子。

⁵ 咚滋咚滋：音 dung+ zii+ dung+ zii+；形容電子音樂的節奏聲。

111 年全國語文競賽客家語朗讀文章高中學生組（大埔腔）

編號 2 號

【夜鷹】邱一帆原作

毋記得對哪時起勢，佢輒輒在斷烏¹時節，聽著天頂「追佢啊追佢，追佢啊追佢」个聲，一聲又一聲，直直對半夜喊到天光，該刺耳吵人个噉聲，正會對吾耳公肚消失。當多年前，佢第一擺在屋下聽著該恁尖恁銳个聲說，實在當佇毋著，趑趑行出屋面前去看。該烏烏像細雞子樣个身影，在天頂飛啊飛、迂啊迂²。成半下，毋知係飛去瘰咧，抑係仰脣，會頓腳在屋頂高，灰灰个烏身，「追佢啊追佢，追佢啊追佢」个聲，還係一聲喊過又一聲。

該係麼个鳥？聲說仰會恁吵人？佢遽遽走轉屋肚去，當認真上網去尋資料，尋上尋下，正發現該種形投个鳥，名斯安做夜鷹。恁起來試著當奇怪！早早在 1861 年斯有人在臺南發現厥个影跡，離這下有一百五、六十年咧，既經算係臺灣特有亞種个鳥，對山頂到平洋、對莊下到都市，滿哪都看得著厥个身影、聽得著厥个噉聲。做麼个佢食到四十零歲，正第一擺在南庄聽著、注意著恁泥个鳥聲、知得恁泥个鳥名呢？佢試著自家已敗勢哦！敗勢

¹ 斷烏：音 ton+ vu+；入夜。

² 迂啊迂：音 din+ a+ din+；轉啊轉。

自家無好好熟事，直直生活在自家身邊个鳥。

逐年新曆二月到八月，係臺灣夜鷹尋伴个繁殖期。七個月恁長个時間，逐隻鳥公都想愛尋著自家理想个對象——鳥嫲，互相培養感情，相好下一代。乜直直愛等到孵出後代，細鳥會飛、離開鳥公鳥嫲个保護，正算完成傳宗接代个使命。因致，在這期間，鳥公對入夜到天光，斯會緊喊「追佢啊追佢，追佢啊追佢」這吵死人个聲骸，來宣示領域，嚇走其他可能个侵入者。也因為夜鷹个聲說歪聽又大聲，當多好恬靜驚吵个人，斯恁泥分夜鷹吵都睡毋得，譴都望毋得夜鷹遽遽無撇去！

佢知夜鷹个聲說當吵，吵都人食睡都毋得，尋伴个繁殖期間，確確實實也影響著人个生活。毋過，夜鷹毋係無一埕好³，佢對環境也有一定个平衡⁴作用。夜鷹个嘴擘去又闊又利，會用佢來搶食蟲，不管係在暗暗个天頂抑係光光个路燈下，水蟻、金姑、草蟻還有當多蟲，做下係厥个食物、厥个好味瑞。因致夜鷹个食雜習慣，多多少少也維持該兜蟲个數量，保護著生態个平衡。

³ 無一埕好：音 moˋ rhidˋ deˋ hoˋ；一無是處。

⁴ 平衡：音 pinˋ fenˋ；指一個物體的運動維持不變（亦即沒有加速或減速）的狀態。

111 年全國語文競賽客家語朗讀文章高中學生組（大埔腔）

編號 3 號

【芋荷葉个智慧】謝錦綉原作

這幾年長在會在報紙、電視新聞項看著，魚个肚屎肚有食著各種个塑膠絡。

今這下因為塑膠絡便宜又利便，毋管燒个、冷个、冰个，總下用塑膠絡來張，無論山頂抑係海脣，大隻細隻，用過斯抨撇，大家早都慣勢恁泥無限制个使用塑膠絡咧。

三不二時看著新聞報導，海盞¹死在海脣，研究人員破開肚屎，發現海盞毋係破病死个，係因為食忒多人類擲到海實个塑膠絡，無法度消化正死撇。海盞歸身塑膠粒个毒性，其他海魚乜共樣有；人又網魚來食，這毒性又轉到人類本身來。結果斯恁泥循環，魚个源頭減少，大環境污染，人類自家乜係大食物鏈其中之一，健康當然受著影響。

今年正月過撇年，偃對嘉義上來臺北寮一兩個月；吾姊戴新店山頂，有所在好種菜，逐擺有菜好摘，佢斯跔跔坐車拿來分偃。

第一擺拿著佢用紙絡張緊个青菜，偃先放冰箱冰，等到愛煮

該下，正打開紙絡，哎哦！正知紙絡肚還用三層芋荷葉包緊，毋係用塑膠絡包哦！吾心肝肚恁：「阿姊呀，你正經跔毋著時代咧？這下還有麼人用芋荷葉包東西？」偃偷偷笑阿姊。

過後，先拿一種菜來煮，旨食个菜照原本个芋荷葉包倒轉去，繼續放冰箱冰。過兩日菜食撇咧，正去拿第二種菜，旨知，打開芋荷葉，包在葉肚个青菜，還本本萋萋；到這下，偃正知芋荷葉恁好用。

這下个時勢，科技進步已遽，大部分人總係認為新个發明較進步，舊換新，舊東西大家相賽斯抨撇。

毋過，無論新抑舊，大家總愛想較長久、想較遠兜，該兜毋會綿、毋會歿个垃圾，越留越多，留到盡尾，地球總會分垃圾奔撇，到該央時，人無法度戴地球，後代子孫乜毋知愛戴去哪位正好？

用芋荷葉保存青菜、魚、肉類，毋單淨比塑膠絡效果較好，另外東西食撇，將芋荷葉擲撇，佢轉到泥肚，自然綿撇，斯會變做肥料養分，全無打爽。芋荷葉無毒性，毋會污染環境，顛倒分地球淨利，分人類康健，這係頭擺人个智慧，愛記得正好。

¹ 海盞：音 hoi^ˆ ang⁺；鯨魚。

【老鼠】張捷明原作

老鼠有當多種：田老鼠、透地鼠¹、錢鼠、大老鼠、細老鼠……，田老鼠在田坵肚絡食，盡愛食番薯，當大隻、又有肉，係頭擺人無豬肉食該下，當重要个肉類來源之一

過來講透地鼠，佢戴在地泥下，盡愛打窿，蒔田个水田，在收冬該下種番薯雜作，若係有透地鼠，等到交春蒔田，田脣斯輒輒會漏水，穩水田²嘎變漏水田。山田个田坎較高，還會慢慢崩田角，老古人言：「大漏漏毋長，細漏漏燥塘。」意思係講，山魚塘係有老鼠窿，大窿漏大水，會緊張，較仰脣無閒，也會抽間³去塞起來，毋過，細窿漏細水，無閒个耕種人斯會想，一屑屑忒等，斯無恁抽間，想講天光日正來補斯好，結果天光日又毋記得，等到想著，魚塘水早都燥撇咧。

田老鼠會爽⁴番薯，人斯捉老鼠來食，算係一報還一報打平過。透地鼠當得人惱，毋過，使得分人想著該句老古人言來教示

子孫，也算佢還有兜功勞。

另外，還有錢鼠，錢鼠實在當得人惱，戴在人屋下个圳溝肚、烏疏疏个所在，細細隻無幾兩肉，還一身臭轟，係現代阿姆盡驚个小動物。毋過，大人也當生趣，偏偏同佢安名錢鼠，驚怕係講，這家人當有錢，穀倉正會有當多穀分錢鼠食敢，好得人類知好畜貓來打老鼠，若無，金山銀山也會分佢食空。

毋過，這下天年顛倒貶，除撇田老鼠、透地鼠、錢鼠，還過加一種寵物鼠。寵物鼠無天敵，連貓都毋係厥對手；今這下个人畜个貓，嘎毋敢打老鼠咧，還較毋敢打寵物鼠，在人个屋下，人畜老鼠服侍佢做阿公，另外又試著對貓過意毋得，因致也用飼料畜貓做寵物，毋單淨毋使寵物貓打老鼠，還同老鼠放共下，表示貓鼠世紀大和解，人類第一功。毋過，麼人會知貓係仰脣想个呢？

二十世紀後，除了寵物鼠，世界又加一種還較新品種个老鼠，毋使飼料，毋會屙屎，淨淨利利又毋會嚙人，日日放到手巴掌惜日惜夜，還使得分人使嘴，佢安做滑鼠。手巴掌捉核厥圓身在桌頂一滑，手指在厥一片耳公一點，斯使得指揮電腦，指揮世界，指揮地球，難怪十二生肖，老鼠早都打第一，貓嘎紙頭無名、紙尾無姓，連同老鼠比大細个資格都無。

¹ 透地鼠：音 pun` ti` chu`；鑽洞鼠。

² 穩水田：音 vun` shui` tien`；能良好保持水量的水田。

³ 抽間：音 chiu+ kien+；積極。

⁴ 爽：音 song`；破壞、損壞。

111 年全國語文競賽客家語朗讀文章高中學生組（大埔腔）

編號 5 號

【阿奶个烏鷄】曾菁怡原作

戴莊下樹多、田多、鳥也多，天時好，打早斯使得看著電線頂高企共下，像旨睡醒个斑鳩，抑係歸陣嘍嘍嘎嘎在路脣絡食个瓦雀，成半下還看得著在天頂飛來飛去个鷄婆。有一種鳥歸身烏疏疏，單淨在翼胛尾同鳥尾有一層層白毛，目珠、觜同該瘦夾夾个腳係黃色个，安做烏鷄。佢總係跳啊跳、跳啊跳，毋多知斯帶佢跳入有吾奶个回憶裡肚。

阿奶係老實个莊下婦人家，溫馴恬靜，為著家庭一生人斯像迷迷轉个極樂樣無時間。天旨光斯愛跣床炆豬菜分豬食；天甫光又愛揸緊衫褲去河壩脣洗；衫褲晾好趕緊去菜園落肥、淋水。除撇這兜，還愛煮三餐、畜頭牲、做田事……。放晝該下正有好歌睏，佢盡愛坐在門口个藤凳項，目絲絲享受清風吹在面項个鬆爽。

有一日放晝，阿奶正坐落來準備歌睏，目珠影著外背个籬笆下有一團烏疏疏个東西在該停動，行俛去看，看著係一隻還毋會飛个烏鷄鳥子。阿奶將佢捧在手項，對頭看到尾；過對尾看到腳。一下揸厥頭那同面頰卵；一下掀開厥幼嫩个翼胛，搨過來搨

過去，像細人抓著生趣个玩具樣，看都眼晶晶無瞞目。

阿奶恁著閒閒有一隻頭擺阿叔畜鷄哥个鳥籠，斯決定愛畜這隻鳥子。逐朝晨，阿奶手、面洗好斯去看籠肚个飼料還有無？愛過添水無？有閒斯同鳥籠拚都淨俐淨俐。食飽晝，阿奶會將藤凳徙到籠脣，俛籠教烏鷄講話：「天光咧！」、「食飽旨？」、「大家好！」、「正來奈」……。日見日，該烏鷄看著人也會講阿奶教佢个話哦！

無想著，有一日朝晨籠門毋知仰脣分人打開咧，裡肚个烏鷄也毋知走去哪位？阿奶兩隻手捧緊飼料，頭磬磬企在籠脣，久久正接受烏鷄毋見撇个事實，嚙呀講：「恁打爽，畜恁久咧講！」該隻鳥籠又收入閒閒肚囤咧。

這個禮拜阿奶做對年，阿姆交代佢愛轉老屋祭拜。燒金該下，幾下隻烏鷄在竹頭下跳啊跳、跳啊跳，成半下探頭這看該看，背尾斯飛到竹林裡肚，單淨伸著風吹過竹葉悉悉疏疏个聲說。毋知阿奶這下有同佢講話个烏鷄無？

111 年全國語文競賽客家語朗讀文章高中學生組（大埔腔）

編號 6 號

【網出阿姆个背影】徐熏琪原作

網路斯像係洋洋洋無邊無脣个大海，網緊人同人之間个距離、網緊世界个脈動、網緊佢等个日常生活。佢，斯像一尾魚，輒輒洄入網肚遊遊野野，緊洄緊深、緊洄嘎緊遠……。

還記得讀國中愛開學个前幾日，阿姆拿一支手機講愛分佢用。頭下碼，佢懷疑係毋係吾耳公有聽爭差，直直到撻著手機，佢暢都耐毋得，心肝肚恁總算有一支手機咧！正想愛仰脣好好來用這手機，斯聽著阿姆講：「分你手機，係方便你同屋下人聯絡事情哦！毋係分你拿來變鬼變怪个，也讀國中咧，自家愛曉得自重，敢做得到？」佢緊領頭講：「阿姆放心啦！佢用手机定著會有分寸。」

續緊幾日過，手機裡肚三不二時會跳出遊戲、社交軟體个訊息，「阿姆放心啦！佢用手机定著會有分寸。」這句話早都變做一陣風，飛到天背遠去咧！

網路世界切斷阿姆同佢之間个信任，毋多知同屋下人講話个時間嘎緊來緊短，同手機共下个時間越來越長；搵手做家务个時間緊來緊少，洄落手機个時間越來越多，佢斯像今這下个低頭族

共樣，一旦手機拿上手，愛過放撇係無恁該个事情。

記得有一日吃飽夜過後，佢堵好同同學搞緊緊張刺激个線上遊戲，阿姆喊佢好去收摯洗碗筷咧，佢詐意無聽著，過無幾久阿姆又過喊加一擺，佢斯譴些些應：「大細心！逐擺都喊佢！屋下單淨伸佢一個人咩？」無想著這句話深深刺著阿姆个心。阿姆聽著了後，恬恬斯行入灶下去洗碗。佢看著阿姆洗碗个背影，試著頭先對自家阿姆堵堵撐撐¹嶄然²過分，斯遽遽手機放撇同阿姆會失禮，將阿姆手頂个碗筷接來洗。

該暗晡為著這件事害佢睡毋落覺，腦膈肚浮出阿姆洗碗个背影，該背影斯像一坭鏡，照出阿姆腰掛背吊个身影，嘎映出佢無款無調个行踏；照出阿姆對佢个開容笑面，嘎映出佢對阿姆眼睜睜个面目。更深夜靜，吾个反省比夜還較長，經過這擺个事件，正感想著自家个日常生活既經分網路世界縹緲，漸漸疏離對屋下人个互動咧。因致，佢想尋轉阿姆對吾个信任，愛自我要求正確來用手机，學校作業定著愛先做撇、搵手做家务了後正用手机，還愛記得同屋下人多多接近，大家和和接接過日該正係盡有溫情个家庭生活。

¹ 堵堵撐撐：音 duˋ duˋ cangˋ cangˋ；頂嘴。

² 嶄然：音 zamˋ rhenˋ；相當的。

111 年全國語文競賽客家語朗讀文章高中學生組（大埔腔）

編號 7 號

【採筍蟲】郭亭好原作

還細時節，爺哀為著愛畜吾等這陣大細，歸日無閒去躁躁轉，屋家肚長在伸著吾等這幾個細孬嘍，輒輒搞去恹咧，毋係伏在長凳板項睡，斯係在戶檻下睡去四腳惹天，天生天養，該係佢識行過个童年。

等阿哥較大漢咧，佢會帶吾等滿田滿畝去拈揚尾、打草蟻、摘土杌、土樣這兜來食。該當時，屋背有種一大蒲个烏葉竹，上篙¹个竹暴芽斯會有筍蛄²來叮筍尾生卵；搞怪个阿哥會帶吾等去捉筍蛄來搞。阿哥捉筍蛄个本等一等慶，佢講愛細義毋好打醒³筍蛄，看佢脆力脆力一下斯同佢擲落來，畀看著个筍蛄無一隻走得撇。佢同捉來个筍蛄用棉線縳核放佢飛，吾等斯踅核筍蛄走，該線一下長一下短，像放紙鷂个樣，等吾等搞恹咧正同線畝撇放佢走。

一擺阿哥嘴豺，帶吾等去尋上篙了正綻葉嘎黃撇个嫩竹，阿

哥講有筍蛄在該位生卵，裡肚會有筍蟲⁴好拈；看阿哥大力摠⁵該葉黃撇个嫩竹，分佢倒拗落來，正經看著筍蟲蠕蠕動，吾等遽遽跔落去搨拈。轉到屋家，阿哥斯將這兜筍蟲放落鑊肚用油煎，吾等企在灶頭脣胥嘍嘍⁶等核，看著該香香赤赤个筍蟲，目擘擘、口涎水硬硬都會跌落來咧！毋過一儕正使得分著幾尾筍蟲忒等，佢同老弟三兩口斯拂淨淨咧，阿哥看著遽遽過同厥碗肚个筍蟲分分吾兩儕過願。該當時，阿哥恁肯分食，吾等嘎無感念阿哥惜吾等个情意，淨知好顧嘴空，這下恹起來對阿哥實在當敗勢。

有一日，隔壁个阿姨來分阿姆請食晝，番綻⁷个阿哥知阿姨毋敢食筍蟲，斯挑挑搥佢，同煎好个筍蟲尖入阿姆正煎好个魚肚，阿姨恍著係魚卵煞猛食，還緊安腦講恁好食。臨尾老弟無細義嘎講出來，害阿姨從緊入便所翻去噁噁滾，該日阿哥斯分阿姆扭緊耳公去同阿姨會失禮，還分阿爸罰去祖公牌前跪歸下晝。

這下恹起細漢个時，雖然無像這下个人生活恁豐湧，毋過日過來當自在，當多該下好搞个齣事，一屑都毋會輸這下細人个網路遊戲，吾等在該田坵山排走相逐个腳跡，還深深印在吾腦膈肚，係盡生趣个回憶。

¹ 上篙：音 shong+ go+；竹筍太慢採收而老化成竹子。

² 筍蛄：音 sun^ gu+；昆蟲名，橢圓形，頭小而口吻特長，如象鼻狀，又稱為「象鼻蟲」。

³ 打醒：音 da^ ciang^；驚擾而使其產生警覺性。

⁴ 筍蟲：音 sun^ chung~；象鼻蟲的幼蟲。

⁵ 摠：音 cai^；速度快且用力搖晃的動作。

⁶ 脣嘍嘍：音 goi+ leu^ leu~；伸長脖子，引頸企盼的樣子。

⁷ 番綻：音 fan+ can~；調皮搗蛋的樣子。

111 年全國語文競賽客家語朗讀文章高中學生組（大埔腔）

編號 8 號

【花樹下个童年】李宜諭原作

美濃永安老街在美濃河个北片，歸條永安路對東門樓到德勝伯公壇，分做上莊、中莊、下莊，吾屋下戴「花樹下」，係前莊，這項有南柵門渡船口，係永安老街盡鬧熱个所在。

花樹下深深刻印吾个童年。吾姆 49 年嫁來美濃，斯在美濃國小教書，還記得，總會看著佢在操場項教大會舞、在禮堂教民俗舞，還有扇舞、竹篾舞、彩帶舞。厥人緣好、手腳溜掠，鄰舍个細妹、婦人家做下會送佢剪伸个布截，佢斯拿來做靚靚个衫褲分吾等著，因致，吾等恁多姊妹小學个學生帽、制服、洋裝、裙、褲，大勢都係吾姆做个。

吾爸嘛係¹先生，佢已會帶吾等做童玩，像：雞毛毬、銅笏²車、竹蟬、竹揚尾、竹笏鬥高腳、紙鷗。該年代，歸伙房大家共下用一個便所，便所下背係糞缸，看著恁深个糞坑，佢斯會頭那暈暈驚種落去³，因致毋敢入去，阿爸斯逐朝晨載吾等幾個細孺嚟去學校上便所，一個人一間，屙撒遽遽轉屋。

還言入學前，佢同大老妹做下係跔阿哥出去寮，去河壩脣灌

土狗、搞園人尋；去田坵項釣蛎；去河壩底捉大肚魚；坐在美濃舊橋頂頂看河壩；在伙房裡背竄上竄下⁴；去阿奶个河壩埔菜園搞寮；攀上鄰舍个牆頭裡背搞捉人，鄰舍譴著斯會放狗出來逐吾等，斯恁泥吾等練著一身攀牆頭个好工夫。

寒天過撇，美濃河還無麼个水，舊曆二月二伯公生會「做大戲」，係美濃一年一到做鬧熱个時節，所有嫁出个歐巴⁵、阿姨、姨婆、姑婆做下會轉來永安老街，在親戚屋下戴幾下日，斯係愛「看大戏」。在南柵門渡船口个河壩脣，會搭當大个戲棚，戲棚下係吾等搞寮个好所在，一陣細人也會偷偷走去舞臺後背，偷看厥等化妝換衫褲。

開始做戲咧，除了頭前幾排个老人家坐緊看以外，其他人做下係企緊看，有兜還會企凳頂，細人根本看毋著，阿爸斯會同吾等攀上肩頭頂，分吾等看一下過願，毋過，因為看毋識也聽毋識，阿爸斯會拿幾角銀分吾等去買食，賣打煙腸、烏梨糖、他瑪⁶汽水……个攤，生理一等好。吾歐巴屋下戴在河壩脣，姑婆、姨婆同阿奶斯會坐在歐巴屋下後背，愛落去河壩底个梯墩頂看戲，佢想，厥等應該都係用聽个吧！「看鬧熱」順續乜共下「打嘴鼓」。

斯恁泥，日見日，年視年，大人無閒濟借過來遽，細人歡喜搞寮定定大。

¹ 嘛係：音 ma⁺ he[`]；也是。

² 銅笏：音 tung[`] gong[`]；鐵罐的統稱。

³ 種落去：音 zhung[`] log[`] ki⁺；栽下去。

⁴ 竄上竄下：音 chon[`] shong⁺ chon[`] ha⁺；穿來穿去。

⁵ 歐巴：音 o[`] va[^]；姑姑。

⁶ 他瑪：音 ta[`] ma[^]；彈珠。

111 年全國語文競賽客家語朗讀文章高中學生組（大埔腔）

編號 9 號

【舉重仙女】蔡承軒原作

阿美生來拗蠻靚，親像仙女下凡。

厥爸當驚阿美路項堵著歪人，斯尋來健身教練訓練阿美。正開始恠著阿美會毋聽講，無想著阿美上課了後斯愛著舉重咧。過後，阿美一放學毋係在健身房斯係去健身房个路項。

阿美進步當遽，擎个重量也緊來緊重。雖然試著已食力，毋過佢看著自家个進步也試著當值。成半下練都歸身瘦軟疾，也當想推懶；有時節無細義著傷，也想愛放撇。逐擺阿美想愛放撇該下，斯會恸著識聽人講過：「危險係真實存在个，毋過愛驚佢抑毋？係若个選擇。」在訓練个過程肚，佢了解著愛看山嶼頂該靚个光景，定著無恠該。

一瞞目，過撇幾下年。這下舉重對阿美來講斯像啟氣个樣恠自然，佢想愛做一個舉重運動員，同鍛鍊身體个觀念傳揚出去分人知。臨尾，教練試著分阿美參加比賽个時機到咧，結果阿美也無分大家失望，在頭一到比賽斯得獎。毋過，佢無半屑自滿，因為佢還有過較大个目標，該斯係參加奧運。

逐日訓練過後，教練都會陪緊阿美共下看優秀選手个影片，

對照阿美還有哪愛改進个所在。同時阿美也陸續去參加比賽，慢慢緊來緊多人斯熟事佢咧，外背个人同佢安一個偏名安做：「舉重仙女」。

行過艱難困苦，阿美總算拿著代表臺灣參加奧運个機會，這係佢幾下年來个夢想，毋過時間及及，佢愛黏時投入訓練，好拿出盡好个表現同國家增光。

在恁多湛斗人才个奧運場項，無半個知阿美係麼人，甚至還有兜藐視這個頭一擺來參賽个黃皮膚細阿妹，這兜對阿美無影響，佢知佢眼時愛做个斯係拿出盡好个表現，毋使加聽人狗呷烏蠅，正經慶个人總係用成績來講話。跔緊比賽緊進行，準講阿美个分數跔人毋著，佢也還係齧等牙根煞猛表現，已遽斯來到盡尾一關个挺直擎¹咧，教練同阿美思量過後打算盡命去拚，去試毋識擎過个重量，準講成功，阿美斯係這屆奧運个金牌得主。

盡尾已無採，阿美跌落棚²咧。佢顛倒毋會試著見笑，因為佢知準講跌落棚，總比無試過正來著切還較甘願。阿美發願，四年過後愛過轉到奧運个比賽場項，同臺灣爭取一坵金牌。

¹ 挺直擎：音 ten^ˆ chid^ˆ kia^ˆ；挺舉。

² 跌落棚：音 died^ˆ log^ˆ pang^ˆ；指失敗。

111 年全國語文競賽客家語朗讀文章高中學生組（大埔腔）

編號 10 號

【燿窯】劉玉蕉原作

打早，斯聽著阿奶交代阿姆，去市場割兜豬肉、買兜萋魚轉來，「欸，古怪！有麼人做生日係無？」問過阿奶正知，係滿姑愛轉妹家，怪得阿奶恁歡喜！探著滿姑轉來個時間，佢走去莊頭阿惜姨個柑店等，佢頭勾勾緊吊望¹。姑丈個車旨駛俚，佢斯走出去攞手咧，姑丈車一頓恬佢斯蹶上車，滿姑笑緊講：「屎脰旨坐燒，斯愛落車咧，恁大閒情！」，知佢歡喜，佢擠入²車肚斯同姑表姐妹大聲搞起來咧。

滿姑帶個等路已錫人，逐儕都有一份，車後斗還有一大布袋個番薯，阿奶講：「番薯恁多仰結煞，無斯來燿窯好咧，屋背田項個泥，上禮拜正翻過，應該乜燥咧，俚來燿窯，愛無？」「好哦！讚啦！」聽著有好搞，吾這兜黏時斯應口。

起窯哩啲，阿爸拗三砵大泥團做窯門，窯身斯尋像厥拳頭嫵恁大個泥砵來結，疊高了還過愛慢慢收俚來，幾下到，結到半爛燦斯屑落來，「唉，老刀嫵無鋼咧，無恁該啣哦！」臨尾還勞擾

阿姑丈搵手，正順勢搵好。窯一起好，阿哥斯指揮命令咧，佢喊佢同姑表姊妹去檢樵枝，阿姊負責起火、架樵，大姊當倚恃得，火畀掌都猛猛猛，紅紅個火舌對泥砵縫項鑽出來，像愛擘食人個樣，害吾這兜閃都遠遠遠，無幾久，泥砵斯燒去像甜柿恁泥紅啾啾咧！

「好勢哩啲，莫過架樵，火退出來了後，斯使得擲番薯入去咧！」阿奶恁泥講。

火炭掬開³來，番薯斯一粒一粒擲入窯肚去。「哇！」表阿哥擎擔竿一掬落去，紅紅個泥砵跔核屑落來，堵好奔在番薯上背，「建設難，破壞容易」，細人輪核掬泥砵，逐個都搵去一頭一面，背尾還係姑丈來收尾，佢同幼泥掖上背，用砂耙過頓畀撈，上背還過插一支香，恁泥一屑煙都無出咧，正喊吾等去祭。真無簡單結跔來個窯，這下看著已像一個番薯壟呢！

園人尋個遊戲旨搞罇，遠遠斯鼻著香味咧，影著阿姆在該開窯，吾這兜遽遽俚過去看佢變奇術，阿姆驚怕番薯畀摟綿，細心細意在該慢慢挖，寬寬摟，香氣錫都吾這兜口涎溶溶跌，肚屎乜機哩咕嚕緊抗議。田脣項，吾等比比坐，香香個番薯塞歸嘴，天恁清，番薯恁香，在屋背個田項，吾等搞到斷烏⁴正轉屋。

¹ 吊望：音 diau` mong`；眺望，看動靜。

² 擠入：音 zi+ ngib`。

³ 掬開：音 boi+ koi+；撥開。

⁴ 斷烏：音 ton+ vu+；天完全黑。